


आकाशवाणी रायपुर (छत्तीसगढ़)
प्रादेशिक समाचार बुलेटिन

18.10 सोमवार

दिनांक 30.03.2026



प्रमुख समाचार –

- 1- केंद्र सरकार के घरेलू उड़ान योजना म अंबिकापुर ले अब दिल्ली कोलकाता बर हवाई सेवा सुरु।
- 2- छत्तीसगढ़ ह ग्रामीण आवास निर्माण म एसो सबले जादा घर बनाय के आंकड़ा करे हे पूरा।

अउ

- 3- छत्तीसगढ़ म चलत प्रथम खेलो इंडिया ट्रायबल गेम्स के छटवां दिन आज रईपुर म हॉकी अउ फुटबॉल के मैच खेले जात हे- उहें, तीरंदाजी के मुकाबला काली ले होही सुरु।

हवाई सेवा-सुभारंभ

केंद्र सरकार के घरेलू उड़ान योजना म अंबिकापुर ले अब दिल्ली कोलकाता बर हवाई सेवा सुरु हो गेहे। मुख्यमंत्री विष्णुदेव साय ह आज रईपुर जिला के चंदखुरी ले ए हवाई सेवा के वर्चुअल सुभारंभ करीन। ए बेरा म ओमन किहीन कि प्रधानमंत्री नरेंद्र मोदी के ए सोच रहे हे कि हवाई पनही पहनइया मनखे घलो हवाई यात्रा कर सकय अउ छत्तीसगढ़ म ए सपना अब साकार होवत दिखत हे। राजधानी दिल्ली अउ कोलकाता ले सोज्जे जुड़ाव होय ले क्षेत्र म व्यापार, पर्यटन अउ आर्थिक कामकाज ल बढ़ावा मिलही। अंबिकापुर के मां महामाया

विमानतल ले आज दिल्ली बर रवाना होय पहिली विमान म सरगुजा सांसद चिंतामणि महाराज समेत आने यात्री सामिल रिहीन।

खबर के मुताबिक अंबिकापुर ले दिल्ली हवाई सेवा सम्मार अउ बुधवार के होही। उहें, कोलकाता बर बिरसपत अउ सनिच्चर के रइही। विमामनन कंपनी एलायंस एयर कोति ले ए उड़ान के संचालन करे जाही। यात्री मनके सुविधा खातिर टिकिट बुकिंग आधिकारिक वेबसाइट म सुरू हो गेहे।

इही बीच, काली ले बिलासपुर के बिलासा देवी कॅवट एयरपोर्ट ले रतिहा कुन हवाई सेवा के सुरूआत करे गेहे। मुख्यमंत्री विष्णुदेव साय ह नाईट आपरेसन के लोकार्पण करीन।

मुख्यमंत्री-पुलिस दीक्षांत समारोह

मुख्यमंत्री विष्णुदेव साय आज रईपुर जिला म चंदखुरी के नेता जी सुभाष चंद्र बोस राज्य पुलिस अकादमी म राखे गे उपनिरीक्षक संवर्ग के दीक्षांत समारोह म सामिल होइन। ओमन परेड के निरीक्षण करत सलामी लीन। ए सत्र म आठ सौ उनसठ इन अपन प्रसिक्षण पूरा करीन, जेमा सूबेदार, उपनिरीक्षक अउ प्लाटून कमांडर सामिल हे। ए बेरा म मुख्यमंत्री ह किहीन कि राज्य सरकार सुरक्षा विकास अउ विस्वास ए तीन स्तंभ म काम करत हे अउ पुलिस के भूमिका ए तीनों ल मजबूत बनाय म बहुते महत्ता के हरय। समारोह म उपमुख्यमंत्री अउ गृहमंत्री विजय शर्मा ह अधिकारी मन ले किहीन कि ओमन अइसन वातावरण बनावय, जेमा अपराधी मनके मन म कानून के डर अउ आम नागरिक के मन म पुलिस बल भरोसा बने रहय। समारोह म आने-आने बिसय म बने प्रदर्सन करइया मन ल सम्मानित करे गीस।

ग्रामीण आवास-उपलब्धि

छत्तीसगढ़ ह ग्रामीण आवास निर्माण म उपलब्धि पावत चालू वित्तीय बछर म छै लाख ले जादा घर पूरा कर लेहे। ए एसो देस म सबले जादा मकान बने के आंकड़ा हे। ए दउरान प्रधानमंत्री आवास योजना- ग्रामीण म पांच लाख सतयासी हजार, प्रधानमंत्री जनमन आवास योजना म तेरह हजार अउ मुख्यमंत्री आवास योजना म दस हजार ले जादा घर बनाय गेहे। ए घर बने ले महिला स्व-सहायता समूह ल आजीविका के नवा मउका मिले हे अउ ओमन लखपति दीदी बनके आर्थिक रूप ले मजबूत होय हे। संगेसंग छै हजार ले जादा राज मिस्त्री मन ल प्रसिखित करे गेहे, जेमा माईलोगिन घलो सामिल हे। उहें, आत्मसमर्पण करइया नक्सली मन ल एखर ले जोड़के ओमन ल सम्मानजनक आजीविका के मउका दे गेहे।

खेलो इंडिया ट्रायबल गेम्स

छत्तीसगढ़ म चलत प्रथम खेलो इंडिया ट्रायबल गेम्स के छटवां दिन आज रईपुर म हॉकी अउ फुटबॉल के मैच खेले जात हे। उहें, अंबिकापुर म कुस्ती के मुकाबला होवत हे अउ जगदलपुर म एथलेटिक्स के मुकाबला आज ले सुरु हो गेहे। हॉकी महिला वरग के फाइनल मुकाबला मिजोरम अउ ओडिसा के बीच एक अप्रैल के रईपुर के सरदार वल्लभ भाई पटेल इंटरनेशनल स्टेडियम म खेले जाही। आज महिला वरग के सेमी फाइनल मुकाबला म मिजोरम ह झारखंड ल दू के मुकाबला तीन गोल ले हराइस। उहें, एक आने सेमी फाइनल मुकाबला म ओडिसा ह मध्यप्रदेस ल सून्य के मुकाबला आठ गोल ले हराइस। पुरुष वर्ग के पहिली सेमी फाइनल मुकाबला झारखंड अउ मध्यप्रदेस के बीच खेले जावत हे। आज संझाकुन दूसर सेमी फाइनल मुकाबला छत्तीसगढ़ अउ ओडिसा के बीच खेले जाही। पुरुष वर्ग के फाइनल मैच घलो एक अप्रैल के होही।

फुटबॉल म पुरुष वर्ग के लीग मुकाबला म ग्रुप ए म पश्चिम बंगाल ह तमिलनाडु ल सून्य के मुकाबला नौ गोल ले हराइस। उहें ग्रुप बी म गोवा ह मिजोरम ल एक के मुकाबला चार गोल ले पराजित करे हे। पदक

तालिका म कर्णाटक पदरंह स्वर्ण समेत पच्चीस पदक के संग अब्बल स्थान म हवय। ओडिसा तेईस पदक के संग दूसर जघा बनाय हे अउ छत्तीसगढ़ दस पदक संग पदक तालिका म नौवा स्थान म हवय।

इही बीच, तीरंदाजी के मुकाबला रईपुर म काली ले सुरु होही।

माओवादी—डंप बरामद

काली इकतीस मार्च के माओवाद समाप्ति के समय—सीमा के एक दिन पहिली मोहला—मानपुर—अंबागढ़ चौकी जिला म पुलिस ल नक्सल मोर्चा म बड़े सफलता मिले हे। सुरक्षाबल ह मदनवाड़ा क्षेत्र के जंगल म माओवादी मन कोति ले बड़ मात्रा म लुकाके राखे गे हथियार बरामद करे गेहे। एमा एके सैंतालीस अउ इंसास रायफल, छियालीस टिन जिंदा कारतूस सामिल हे। राजनांदगांव रेंज के आईजी बालाजी राव ह मोहला म एक प्रेस कॉन्फ्रेंस म बतइन कि नक्सली डंप के सूचना मिलतेच डीआरजी अउ आईटीबीपी के जवान मन ह आज बिहनिया जंगल म सर्च आपरेसन चलाइन। इही दतरान ए हथियार बरामद करे गेहे।

वन क्षेत्र—अवारा कुत्ता रोक

वन क्षेत्र अउ अभ्यारण्य म ऐति—तेति किंजरइया अवारा कुकुर मनके प्रवेस म रोक लगाय बर वन विभाग ह सख्ती बढ़ा देहे। कुछेक दिन पहिली अंबिकापुर म अवारा कुकुर कोति ले हिरण मन ल मार डारे के घटना के बाद ए कदम उठाय गेहे। प्रधान मुख्य संरक्षक अरुण कुमार पांडे ह ए संबंध म सबो क्षेत्रीय अधिकारी मन ल जरूरी निरदेस जारी करे हे, जेखर मुताबिक वन क्षेत्र के तीर के गांव म पालतू कुकुर मन ल बिसेस रंग के पट्टा पहिराय जाही, जेखर ले उंखर चिन्हारी हो सकय। कहू कोनो पालतू कुकुर वन क्षेत्र म पाय जाही, त उंखर मालिक के खिलाफ नियम के मुताबिक कार्रवाई करे जाही। वन क्षेत्र के तीर—तखार के गांव म पोस्टर बैनर अउ

ग्रामसभा ले जन जागरूकता अभियान चलाके लोगन ल जागरूक करे जाही। एखर उद्देश्य वन के जीव जन्तु मन ल हमला अउ रैबिज जइसन बीमारी ले बचाना हे।

जशपुर डिजीटल कर भुगतान

जशपुर नगर पालिका क्षेत्र म अब टेक्स जमा करे बर दफ्तर के चक्कर लगाय के जरूरत नइ पड़य। अब ओमन डिजीटल डोर सुविधा ले घर बइठे क्यू आर कोड स्कैन करके जल, संपत्ति अउ दुकान कर के भुगतान कर सकही। मुख्यमंत्री विष्णुदेव साय ह ए सेवा के सुभारंभ करीन। ए नवा बेवस्था म नगर पालिका जशपुर बर बिसेस क्यू आर कोड तियार करे गेहे। हरेक घर बर आने-आने क्यू आर कोड तियार हवय, जउन ल घरोघर चस्पा करे जात हे। ए क्यू आर कोड म मकान मालिक के नांव, मकान नंबर, मोबाइल नंबर अउ बकाया कर के जानकारी मिलही। नागरिक क्यू आर कोड स्कैन करके डी.डी.एन. नंबर, मोबाइल नंबर या प्रापर्टी आईडी ले अपन भुगतान देख सकही अउ भुगतान करे बाद तुरते डिजीटल रसीद मिल जाही।

मौसम

प्रदेस म काली एक-दू जघा म छूटपुट बरसा होय अउ गरज-चमक संग छींटा बौछार पड़े के संभावना हरय। मौसम विभाग के मुताबिक एक-दू जघा म हवा गरेर चले गाज गिरे अउ करा गिरे के आसार हे। प्रदेस म एखर ले अधिकतम तापमान म थोरिक गिरावट हो सकत हे। इही बीच, बस्तर जिला म औचक मौसम बदलगे अउ मंझनिया बाद हवा गरेर संग बरसा होइस। जेखर ले तापमान म कमी आय हे।

संक्षिप्त समाचार

— रईपुर नगर निगम के वित्तीय बछर दू हजार छब्बीस—सत्ताईस बर महापौर मीनल चौबे ह आज दू हजार एक सौ तीस करोड़ रूपिया ले जादा के बजट पेस करीन। ए बजट म ओमन वर्किंग वूमेन हास्टल नालंदा परिसर असन लाइब्रेरी, यूथ हास्टल, इलेक्ट्रानिक मार्केट, आटोमेटिक पार्किंग अउ हरेक वार्ड म बर्तन बैंक बनाय समेत कतकोन योजना के घोसना करीन।

अउ

— दुरुग पुलिस ह नसा के खिलाफ कार्रवाई करत खुर्सीपार थाना क्षेत्र ले अंतर्राज्यीय गिरोह के तीन सदस्य ल गिरफ्तार करे हे। एखर तीर ले तैंतालीस ग्राम ले जादा हेरोइन जब्त करे गेहे, जेखर कीमत करीबन साढ़े आठ लाख रूपिया आंके गेहे।

